

# Carta nū cuítí naçahyí Juan nuú na cúú cuéntá Jesús

---

## Cáxi tuhun Juan nuú ñayivi sahá Jesucristo

**1** Cáhyinde carta yóho nū ndó sahá Jesucristo, mé á nasahiin janda tá cámaní cava sáhá saha ñuyiví. Mé nde naxini johó nde ña naçahan mé á ta chí naxini xihín nuú nde mé á. Nasandehé nde a ta naçani ndaa ndahá nde a. Cáhan nde sahá Jesucristo mé á cúú tuhun Ndióxi, ña cája ña ná catacu ñayivi anda ama cáa quivi. <sup>2</sup>Najánaha mé á nuú ñayivi ta mé nde naxini nde a sahá ña cán queá cáxi tuhun nde nuú ñayivi saha mé á. Ta ndícani nde nū mé ndó viti saha Jesucristo, mé á sa janda ama cáa quivi íin a xihín Ndióxi, tátá a ta co ndíhi toho sahá. Viti naquixi a najánaha mé á nū yo. <sup>3</sup>Ta cáxi tuhun nde nū ndo ña naxini nde xihín ña naxini johó nde já ná cuu in canduu ndó xihín mé nde. Jáchi in nanduu yó xihín Ndióxi, tátá yo ta xihín Jesucristo, mé a cúú in túhún jini já jahyi Ndióxi. <sup>4</sup>Ta cáhyí nde ña yóho nū ndo já ná ndicutú ndaa ínima yo xihín ña cajii íni yo.

## Jándiyehé ndaa Ndióxi nū íin a

<sup>5</sup>Ña najánaha Jesucristo nuú nde cúú á ña jánaha nde nū ndó viti: Jándiyehé ndaa Ndióxi nū íin a ta ni loho ña naá co íin nū íin mé á. <sup>6</sup>Tá ná cachi yó ña in nanduu xihín Jesucristo nani cája í cuachi já queá cúú á tátuhun ndúu yii yó nuú naá jáchi cátuhún yo ta co cája í ña ndaa. <sup>7</sup>Joo tá ndúu yó nū yéhe tá quiahva íin Ndióxi nuú ña yéhe já queá in nduu ndihí. Ta Jesucristo, mé a cúú in túhún jini já jahyi Ndióxi jándoo ndihí a cuachí jáchi naxita nii á saha yo tá naxihi a ndica crúxu.

<sup>8</sup>Ta tá ná cachi yó ña coó toho cuachi cája í já queá jándahví mé ví ta co ndácaan ña ndaa íni. <sup>9</sup>Joo tá ná nahma yó cuachí nū Ndióxi já queá cuu candeé íni ña caja ndaa Ndióxi xihín yo jáchi caja cáhnu ini a sahá cuachí ta ndaja vií a mí nū tóco ndihí ña núu. <sup>10</sup>Joo tá ná cachí ña ni in túhún toho cuachi coó naçaja í já queá ndája túhún yo Ndióxi ta xihín ña yóho náha ña mé a ndaa táhyí coó nandiquehe vaha í tuhun vaha cáhan saha mé á.

### Jesucristo quéa cáhan cuachi a saha yó nu Ndióxi

**2** Candehé ndó. Mé ndó cúú ndó tátuhun jahyi válí i ta cáhyí i ña yóho nu ndo ña ná a cája ndó cuachi. Ta vatí ná caja ndó cuachi joo íin Jesucristo cáhan cuachi a saha yó nu Ndióxi, tátá a. Ta cája mé á ña ndaa cuití va. <sup>2</sup>Jáchi nachahvi Jesucristo sahá cuachi tá naxihi a ndica crúxu. Já quéa xihín ña yóho cuu caja cáhnu ini Ndióxi sahá cuachi. Ta a juú sahá cuachi mé cuití yo, vaha jáchi naxihi rí a sahá cuachi ndaja táhan na ndúu ñuyíví.

<sup>3</sup>Jáchi tá cája í ña sáhdá Ndióxi já quéa náha ña mé a ndaa táhyí xini yo mé á. <sup>4</sup>Joo tá cáchí in na ña xini na Ndióxi nani co cája na ña sáhdá mé á já quéa cúú ná na tuhún ta co ndácaan ña ndaa ini na. <sup>5</sup>Joo na cája ña sáhdá Ndióxi, náha ña mé a ndaa táhyí quíhvi ini na mé á ta xihín ña yóho cándaa ini yó ña in nanduu na xihin mé á. <sup>6</sup>Ta ndá na cáchí ña in nanduu na xihin Ndióxi, xini ñuhú caja na tá quiahva nacaja Jesucristo tá nasahjin a ñuyíví yóho.

### Sáhdá Ndióxi chuun ña ná quíhvi ini táhan í

<sup>7</sup>Candehé ndó ñani i, na cúú cuéntá Jesús. Co cáhyí i nu ndó in chuun saá ña nasahnda Ndióxi caja ndó. Cúú á mé chuun natahnda nu ndó caja ndó janda mé saha tá nandihvi ndó íchi cuéntá Jesús. Ta cúú á ña sa naxini johó ndó anda mé cán. <sup>8</sup>Joo mé a ndaa ña cáhyí i yóho cúú á chuun saá jáchi sáhdá Ndióxi ña ná quíhvi ini táhan í. Ta tá cája í ña sáhdá Ndióxi já quéa quéé ndihi ña naá cuahan ta mé a ndaa jándiyehé Jesucristo ínima yo jáchi quíhvi ini táhan í tá quiahva nacaja mé á.

<sup>9</sup>Ta ndá na ná cachi ña sa nandiyehé ínima ná nacaja Jesucristo nani cándají na ñani na, na cúú cuéntá Jesús já quéa cúni cachi a ña ndúu yii ná nuú naá ndivaha. <sup>10</sup>Ta ndá na quíhvi ndusa ini ñani na já quéa cúni cachi a ña mé a ndaa jándiyehé Jesucristo ínima ná ta ni in ñaha a cúu caja ña ná ndacava na nuú cuachi. <sup>11</sup>Joo ndá na cándají ñani na já quéa ndúu na nuú naá ta xica na nuú naá yave. Ta ni co xini na ndáchí xica na jáchi cúú ná tátuhun na cuaá jáchi ndúu na nuú naá.

<sup>12</sup>Mé ndó cúú ndó tátuhun jahyi i ta cáhyí i carta yóho nu ndo jáchi sahá ña nacaja Jesucristo nacaja cáhnu ini Ndióxi sahá cuachi. <sup>13</sup>Ta cáhyí i carta yóho nu ndó, nataa, na cúú tátá jáchi nacandaa ini ndó sahá Jesucristo, mé a sa íin janda tá nacava sahá saha ñuyíví. Ta cáhyí ri carta yóho nu ndó, taa yúta jáchi nacandee ndó nasahnu ndó nuú tiñáhá sacuha.

Candehé ndo. Mé ndó cúú ndó tátuhun jahyi i ta cáhyí i carta yóho nu ndo jáchi nacandaa ini ndó yo cúú Ndióxi, tátá yo. <sup>14</sup>Ta cáhyí ri carta yóho

nū ndó, na cúú tátá jáchi nacandaa ini ndó sahá Jesucristo, mé a sa íin janda tá nacava sahá saha ñuyíví. Ta cáhyí rí carta yóho nū ndó, ta yúta jáchi sahan ndeé ini ndó ta ndacaan tuhun Ndióxi ini ínima ndo ta nacandeé ndó nasahnu ndó nuú tiñáhá sacuaḥa.

<sup>15</sup>Ta coto a cátóó ndó ña cúú cuéntá ñuyíví yóho ta ni a ndiáva ini ndo cacomí ndó ña ndúu ñuyíví yóho. Jáchi ndá na cúni ñaha ñuyíví yóho já queá cúni cachi a ña co cúni na Ndióxi, tátá yo. <sup>16</sup>Jáchi ni in ña núu ndúu ñuyíví yóho coó vaxi a cuéntá Ndióxi, tátá yo. Ta ña yóho cúú á ña a váha toho cáhvi ini ñayivi caja na ta jári ndiáva ini na cacomí na ña xíní na xihín nuu ná ta jári ndíñehe jícó ndivaha na mé ná sahá ña cómí na. Ndijáá ña yóho cúú á ña núu quíxi mé ñuyíví yóho. <sup>17</sup>Vaxi quíví ndihi saha tóco ndihi ña ndiáva ini ñayivi ta janda mé ñuyíví yóho ndihi sahá joo ndá na cája ña sáhdá Ndióxi, na cán cúú na catacu nū íin mé á anda ama cáa quívi.

### Na co cúni táhan xihín Jesucristo

<sup>18</sup>Candehé ndo jáchi cúú ndó tátuhun jahyi i. Jalóho cúni ndihi saha ñuyíví ta sa xíní johó ndó sahá in da vaxi caja ihvi xihín Jesucristo. Ta mé tiempo yóho sa naqueta cuahá na co cúni táhan xihín mé á. Sahá ña yóho sa cándaa ini yó ña sa nacayati quíví ndihi sahá ñuyíví yóho. <sup>19</sup>Mé na co cúni táhan xihín Jesucristo yóho nasañúhu na tañu mí. Joo a juú toho na cuéntá mí nasacuu na. Jáchi tá ná cacuu na cuéntá mí já canduu na tañu mí, nduu. Joo naqueta na cuahan na já ná naha ña mé a ndaa co cúú ná cuéntá mí.

<sup>20</sup>Joo nū mé ndó nasahan Jesucristo ínima yíi mé á sahá ña cán queá tóco ndihi ndó cúú ndó ñayivi xíní ña ndaa. <sup>21</sup>Tá cáhyí i carta yóho nū ndo, co cúú á sahá ña co xíní ndó ña ndaa. Joo cúú á sahá ña sa xíní ndó ña ndaa ta sa xíní ndo ña ni in túhún ña tuhún a cúú quixi tañu ña ndaa.

<sup>22</sup>Na tuhún cúú ná na co cúni ndicuni ña cúú Jesucristo mé á nachindahá Ndióxi jácacu a ñayivi. Mé na tuhún yóho cúú ná na co cúni táhan xihín Jesucristo jáchi co cúni na ndicuni na Ndióxi, tátá yo ta ni co cúni na ndicuni na Jesucristo, mé a cúú in túhún jini já jahyi Ndióxi.

<sup>23</sup>Jáchi ndá na chíjehé tuhun ña xíní na Jesucristo, jahyi Ndióxi já cúni cachi a ña coó in nanduu na xihín Ndióxi, tátá yo. Joo na cuahan xoo Jesucristo, jahyi Ndióxi in nanduu na xihín Ndióxi, tátá yo.

<sup>24</sup>Sahá ña cán queá xíní ñúhú cacu vaha ndó tuhun Ndióxi ini ínima ndó, jáchi cúú á ña naxini johó ndó janda mé saha tá nandiquehe ndó íchi cuéntá Jesús. Ta tá mé a ndaa ndicaan ña naxini johó ndó ini ínima ndo já queá anda ama cáa quívi in nduu ndó xihín Ndióxi, tátá yo ta in nduu ndó xihín Jesucristo, mé a cúú in túhún jini já jahyi Ndióxi. <sup>25</sup>Ta nasahan Jesucristo tuhun a nū yo ña catacú xihín mé á anda ama cáa quívi.

<sup>26</sup>Cáhyí i ña yóho nu ndo já ná candaa ini ndó sahá na cúni jándahvi ndohó. <sup>27</sup>Joo ndácaan ínima yii Ndióxi ini ndó, mé a nasahan Jesucristo nu ndo. Sahá ña cán quea co xini ñuhú toho ndó inga na jánaħa na ndohó jáchi mé ínima yii Ndióxi, ña ndácaan ini ndó jan jánaħa tóco ndihi ñaha nu ndo. Ta ña jánaħa mé á nu ndó cúu á ña ndaa ta co cúu á ña tuhún. Sahá ña cán quea xini ñuhú catáhan tuun ndó xihín Jesucristo tá quiahva sácaja ndó jáchi quiahva já najánaħa ínima yii Ndióxi nu ndo.

<sup>28</sup>Candehé ndo jáchi cúu ndó tátuhun jahyi i. Xini ñuhú catáhan tuun í xihín Jesucristo já ná cuu candeé ini mé á tá ná canáħa mé á quixi a ta já ná a cácahan nuu yo tá ná cuni mé á. <sup>29</sup>Mé ndó sa candaa ini ndó ña cája Jesucristo ndinuhu ña ndaa cuití va. Ta tá cája mé ndó ña ndaa já quea jánaħa ndó ña mé a ndaa cúu ndó jahyi Ndióxi.

### Ná cúu jahyi Ndióxi

**3** Candehé ndó. A juú quiahva quíhvi ini Ndióxi, tátá yo mí anda nasahan ñamani nu yo cananí yo jahyi Ndióxi ta mé a ndaa cúu yo jahyi mé á. Joo ñayivi ñuyíví co xini na Ndióxi sahá ña cán quea co ndícuni na ña cúu yó jahyi mé á. <sup>2</sup>Candehé ndo, ñani máni, na cúu cuéntá Jesús. Sa cúu yó jahyi Ndióxi vatí viti ñuhú co candaa ini ndá quiahva nduú. Joo candaa vaha ini ña tá ná quixi Jesucristo já nduú tá quiahva cáa mé á jáchi cuni mé á tá quiahva cáa tá íin a. <sup>3</sup>Ta tóco ndihi na ndáti nduu na tá quiahva cáa mé á já quea ndaja vií na mé ná jáchi cúni na coo vií na tá quiahva íin vií Jesucristo.

<sup>4</sup>Tóco ndihi na cája cuachi sáħnu na nu ley Ndióxi jáchi tóco ndihi ña núu cúu á cuachi nu ley Ndióxi. <sup>5</sup>Mé ndó sa candaa ini ndó ña naquixi Jesucristo ñuyíví yóho ta naxihí a já ná cuu ndoo cuachi ñayivi. Ta coó ni in tuhún toho cuachi mé á. <sup>6</sup>Sahá ña cán quea tóco ndihi na cáti vi tuun xihín mé á co xica nuu ga na cája na cuachi. Joo na xica cája cuachi jánaħa na ña co xini toho na mé á ta jánaħa na ña co cúu na cuéntá mé á. <sup>7</sup>Candehé ndó jáchi cúu ndó tátuhun jahyi i. Cuéntá coo ndó ná a jándahvi ni in na ndohó. Jáchi ñayivi ndaa cája ndaa na tá quiahva cája Jesucristo. <sup>8</sup>Joo na xica nuu cája cuachi cúu ná cuéntá tiñáħa sacuaħa jáchi janda mé saħa nacaja rí cuachi. Sahá ña cán quea naxinu Jesucristo ñuyíví yóho, mé á cúu in tuhún jini já jahyi Ndióxi ta naquixi a jándihi a sahá ña núu cája tiñáħa sacuaħa.

<sup>9</sup>Ni in tuhún toho na cúu jahyi Ndióxi co xica na cája na cuachi jáchi viti nanduu na tá quiahva íin mé á. Ta co cúni ga na caca nuu na caha na cuachi jáchi cúu ná jahyi Ndióxi. <sup>10</sup>A íhvi toho ndicuní ndá na cúu jahyi Ndióxi ta ndá na cúu jahyi tiñáħa sacuaħa. Jáchi na co cája ña ndaa ta na

co quíhvi ini ñani táhan na cán cúú ná jánaḥa ña co cúú ná cuéntá Ndióxi.

**Ndítahan nu yo quíhvi ini táhan í**

<sup>11</sup>Janda mé saḥa tá nandiquehe ndó íchi cuéntá Jesús já naxini johu ndó ña cáchi tuhun Ndióxi ña ndítahan quíhvi ini táhan í. <sup>12</sup>Co ndítahan caja í tá quiahva nacaja Caín sanahá jáchi nasacuu da cuéntá tiñahá sacuaḥa. Ta nasahní da ñani da jáchi mé Caín nasacaja da ña núu cuití va ta nandicuni da ña vaha cuití va nasacaja ñani da.

<sup>13</sup>Candehé ndó, ñani mí i, na cúú cuéntá Jesús. A catóntó ndo tá cándají ñayivi ñuyíví ndohó. <sup>14</sup>Tá quíhvi ini na cúú cuéntá Jesús já quea sa xini yo sa najacacu mé á mí ná a cuhun toho í indayá joo cuhun í coo í nu íin mé á indiví. Joo ndá na co quíhvi ini ñani táhan na, cúú ná tátuhun in ndii. <sup>15</sup>Ta tóco ndihi na cándají ñani táhan cúú ná tátuhun in na sáhní ndii jáchi sáhní na ñani táhan na ini ínima na. Ta mé ndó sa cándaḥa ini ndó ña ni in na sáhní ndii co núná nu ná cuhun na indiví catacu na anda ama cáa quivi. <sup>16</sup>Mé Jesucristo najánaḥa nu yo ndá quiahva cája ndusa in na quíhvi ini ñani táhan jáchi naxihi a saḥa yo. Quiahva já ndítahan ri nu mí ví coo tiaḥva í quiví saḥá ñani táhan í, na cúú cuéntá Jesús. <sup>17</sup>Joo tá íin in na ta íin cuahá ndivaha ñaha nu ná ta co cuni na chindeé na na cúú cuéntá Jesús, na ndímaní ñaha nuu já quea a cuú cachi na ña quíhvi ini na Ndióxi. <sup>18</sup>Mé ndó cúú ndó tátuhun jahyi i saḥá ña cán quea cáhan i xihin ndo ña xini ñuhú jánaḥa yó xihin ña cája í ña quíhvi ini ñani táhan í ta a juú xihin yuhú ninu uun í cuití va.

**Co ndítahan cayihví yo Ndióxi  
tá cája í ña sáhdá a**

<sup>19</sup>Tá cája í ña ndaa, ña cuni Ndióxi já quea cándaḥa ini ña cúú yó cuéntá mé á ta íin vaha ini xihin mé á. <sup>20</sup>Ta vatí cáhvi ini ña coo nacaja vaha í joo xini vaha chága Ndióxi á mé a ndaa nacaja núu í á coo a jáchi xini mé á tóco ndihi ñaha. <sup>21</sup>Candehé ndó ñani mání, na cúú cuéntá Jesús. Tá xini vaha í ña ndacaan ña vaha ínima yo já quea co yíhvi toho í cahan í xihin á. <sup>22</sup>Ta mé Ndióxi quea quiahva tóco ndihi ña xica yó nu á jáchi mé a ndaa cája í ña sáhdá a nu yo ta cájii ini mé á xihin ña cája í. <sup>23</sup>Ta ña sáhdá Ndióxi nu yo cúú á ña ná candee ini Jesucristo, mé a cúú in túhún jini já jahyi mé á. Ta sáhdá a nu yo ña ná quíhvi ini táhan í tá quiahva natahnda chuun nu yó caja í. <sup>24</sup>Ta na cája ña sáhdá Ndióxi in nanduu na xihin mé á ta in nanduu mé á xihin na. Ta saḥá ña nasacu Ndióxi ínima yii mé á ini in in í saḥá ña cán quea náha ña in nanduu yó xihin mé á.

**Ínima yii Ndióxi co ndíque táhan xihín ínima quini ña ndácaan ini na co cúní táhan xihín Jesucristo**

**4** Candehé ndo, ñani mí i, na cúu cuéntá Jesús. A cándúsa ndó tóco ndihi na cáchí ña cúu ná cuéntá Ndióxi jáchi cuaha ná cúu ná na tuhún. Ña xíní ñúhú caja ndó quea coto ndojó ndó na já ná candaa ini ndó á mé a ndaa ndácaan ínima yii Ndióxi ini na á coó a. Jáchi cuahá ndivaha na tuhún nandicuítá nuu na ñuyíví yóho jándahvi na ñayivi vatí cáchí na cáhan na cuéntá Ndióxi. <sup>2</sup>Xihín ña yóho cuu candaa ini ndó ndá na cúu na ñúhu ínima yii Ndióxi ini jáchi tóco ndihi na cándúsa ña nanduu Jesucristo in ñayivi ñuyíví yóho na cán cúu ná na ñúhu ínima yii Ndióxi ini. <sup>3</sup>Joo na co cándúsa ña nanduu Jesucristo in ñayivi ñuyíví yóho, na cán cúu ná na co ñúhu ínima yii Ndióxi ini jáchi ña ndácaan ini na cán cúu ínima quini, ña co cúní táhan xihín Jesucristo. Sa naxini johó ndó ña quixi tá quixi mé ínima quini, ña co cúní táhan xihín Jesucristo ta sa íin a ñuyíví yóho viti.

<sup>4</sup>Candehé ndo jáchi cúu ndó tátuhun jahyi i ta cúu ndó cuéntá Ndióxi. Nacandee ndó nasahnú ndó nuú na jánahá ña tuhún jan jáchi tóyíí chága ínima yii Ndióxi ndácaan ínima ndo a juú ga ínima quini ndácaan ínima ñayivi ñuyíví. <sup>5</sup>Mé na jan cúu ná cuéntá ña núu ñuyíví yóho ta ñaha ñuyíví yóho cuití cáhan na saha. Ta ñayivi ñuyíví táa johó na ña cáhan na. <sup>6</sup>Joo mí cúu yó cuéntá Ndióxi. Saha ña cán quea na cúu cuéntá Ndióxi xíní johó na ña cáhan yo. Joo na co cúu cuéntá Ndióxi co xíní johó na ña cáhan yo. Ta xihín ña yóho cuu ndicuní ndá na cúu na ndácaan ínima yii Ndióxi ini ta ndá na cúu na ndácaan ínima quini ini. Jáchi ña ndaa cúu ínima yii Ndióxi ta ínima quini cúu á ña tuhún.

**Quíhvi ini ndusa Ndióxi ñayivi**

<sup>7</sup>Candehé ndo, ñani máni, na cúu cuéntá Jesús. Xíní ñúhú quíhvi ini táhan í jáchi ña yóho quixi a cuéntá Ndióxi. Tóco ndihi na quíhvi ini ñani táhan cúu ná jahyi Ndióxi ta xíní na yo cúu Ndióxi. <sup>8</sup>Na co quíhvi ini ñani táhan jánahá na ña co xíní na Ndióxi jáchi Ndióxi quea sahan nu yo ña ná quíhvi ini táhan í. <sup>9</sup>Ta nachindahá Ndióxi Jesucristo, mé in tuhún jini já jahyi a ñuyíví yóho ña ná quivi a saha yo já ná catacú anda ama cáa quivi. Xihín ña yóho najánahá Ndióxi ndá quiahva quíhvi ini a mí. <sup>10</sup>Candehé ndo ndá quiahva quíhvi ini Ndióxi mí. A juú jihna ñúhú mí naquíhvi ini Ndióxi jáchi jihna ñúhú ga Ndióxi naquíhvi ini a mí. Ta nachindahá a Jesucristo, mé in tuhún jini já jahyi a ña ná चाहvi mé Jesús sahá ndihi cuachí tá naxihí a ndica crúxu.

<sup>11</sup>Candehé ndo, ñani máni, na cúu cuéntá Jesús. Tá ta quiahva johó nacaja Ndióxi sahá ña quíhvi ini a mí já quea ndítahan ri nu mí ví quíhvi



ini táhan í. <sup>12</sup>Ni in ñayivi coó ñaxini xihín nuu ná Ndióxi. Joo ñúhú mé á iní tá quíhvi ini táhan í. Ta xihín ña yóho jáxinu coo í ña quíhvi ndusa iní ñani táhan í. <sup>13</sup>Ta sahá ña nasacu Ndióxi ínima yii mé á ini in in yó sahá ña cán queá náha ña in ñanduú xihín mé á ta in ñanduu mé á xihín yo. <sup>14</sup>Ta mé nde ñaxini nde a xihín nuu nde ta cáxi tuhun nde xihín ndaja táhan ñayivi ña nachindahá Ndióxi, tátá yo Jesucristo, mé a cúu in túhún jini já jahyi a ña ná jácacu a ndaja táhan ña ndúu ñuyíví. <sup>15</sup>Ndá ña cándúsa ña cúu Jesucristo in túhún jini já jahyi Ndióxi, ña ñan cúu ña in ñanduu xihín Ndióxi ta in ñanduu Ndióxi xihín ná.

<sup>16</sup>Ta viti sa ñacandaa iní ta cándúsa í ña mé a ndaa quíhvi ini Ndióxi mí. Ta ndá ña quíhvi ini Ndióxi já in ñanduu na xihín Ndióxi ta in ñanduu Ndióxi xihín ná. <sup>17</sup>Ta xihín ña yóho jáxinu coo í ña quíhvi iní ñani táhan í xihín ndinuhu iní. Sahá ña cán queá tá ná xinu coo quíhvi caja víí Ndióxi sahá ñayivi já queá a cácahan nuu yo tá candichí nu Ndióxi. Jáchi tá quiahva nasacaja Jesucristo tá nasahiin a ñuyíví yóho quiahva já cája í viti. <sup>18</sup>Mé a ndaa quíhvi ini Ndióxi mí ña cán queá co yíhvi toho í mé á. Jáchi tá ná cahán yo jándoho Ndióxi iní já queá cayihví yo mé á. Joo tá ná candaa vaha iní ña mé a ndaa quíhvi ndusa ini Ndióxi mí já queá a cáyihví toho í mé á. Ña cán queá tá yíhvi yo mé á já queá co xini yo ña quíhvi ndusa ini a mí.

<sup>19</sup>Quíhvi iní Ndióxi jáchi jihna ñúhú ga mé á ña quíhvi ini a mí. <sup>20</sup>Joo tá íin in na ta cáchí ña quíhvi ini na Ndióxi joo cándají ña ñani táhan na já queá jánaħa ña ña cúu ná ña tuhún. Jáchi tá co quíhvi ini na ñani táhan na, ña sándeħe ña xihín nuu ná ndaja caja na cachi na quíhvi ini na Ndióxi, ña a cúu cuni tívi na. <sup>21</sup>Ñasahnda Jesucristo chuun yóho nu yo: Ndá ña quíhvi ini Ndióxi já ndítahan nu ná quíhvi ri ini na ñani táhan ña viti.

#### Ndaja caja í quee vaha í xihín ña núu ndúu ñuyíví yóho

**5** Tóco ndihina cándúsa ña cúu Jesús mé á nachindahá Ndióxi cacomí a cuénta sahá ñayivi, ña ñan cúu ndusa jahyi Ndióxi. Ta ndá ña quíhvi ini Ndióxi, tátá yo, xini ñúhú quíhvi ri ini na tóco ndihi ña cúu jahyi mé á. <sup>2</sup>Tá quíhvi iní Ndióxi ta tá cája í ña sáhdá mé á nu yo caja í, xihín ña yóho cándaa cáxi iní ña quíhvi iní ña cúu jahyi Ndióxi. <sup>3</sup>Ta ña cája ña sáhdá Ndióxi, ña cán cúu ña jánaħa ña mé a ndaa táhyí quíhvi ini na mé á ta chuun sáhdá mé á nu yo co cúu á in ñaha ña a cúu candeé yó xihín. <sup>4</sup>Ta tóco ndihi ña cúu ndusa jahyi Ndióxi candeé ña sáħnu ña nuú ña núu ñuyíví yóho. Sahá ña cán queá tá candeé iní Jesucristo já queá quee vaha í xihín ña núu ndúu ñuyíví yóho. <sup>5</sup>Ndá ña cándúsa ña cúu Jesucristo in túhún jini já jahyi Ndióxi, ña cán cúu ña candeé sáħnu nuú ña núu ndúu ñuyíví yóho.

**Sáhan ínima yii Ndióxi tuhun sahá Jesús ña cúu á in túhún jini já jahyi Ndióxi**

<sup>6</sup>Tá naquixi Jesucristo ñuyíví yóho já nacandúta mé á xihín ticuíí. Ta jári naxita nii á tá naxihi a ndica crúxu saha yo. Nacaja Jesucristo ndíví ña yóho: nacandúta xihín ticuíí ta naxita nii á tá naxihi a ndica crúxu. Ta mé ínima yii Ndióxi sáhan tuhun sahá ña yóho ta ña cáhan mé á cúu á ña ndaa. <sup>7</sup>Ndúu uní testigo indiví ta sáhan tuhun sahá Jesús ña cúu á in túhún jini já jahyi Ndióxi: In testigo cúu Ndióxi, tátá yo ta inga testigo cúu tuhun Ndióxi ta inga testigo cúu ínima yii Ndióxi. Ta in cúu ndíhuní a sáhan tuhun sahá Jesús. <sup>8</sup>Ta ndúu uní testigo ñuyíví yóho. Ta in testigo cúu á ínima yii Ndióxi ta inga testigo cúu á tá nacandúta Jesús ta testigo cáhuní cúu á tá naxita nii Jesús ndica crúxu. Ta ndíhuní testigo yóho sáhan tuhun a sahá Jesús ña cúu á in túhún jini já jahyi Ndióxi. <sup>9</sup>Íin tiahva í cándúsa í ña cáhan ñayivi xihin yo tá sáhan na tuhun sahá in ñaha. Ña cán quea ama ná a cándúsa í ña cáhan Ndióxi xihin yo jáchi ña cája mé á quea sáhan tuhun sahá Jesucristo, jahyi a ta ña yóho cúu á ña ndíyahvi chága a juú ga ña cáhan ñayivi. <sup>10</sup>Ta tá cándúsa í ña cúu Jesucristo in túhún jini já jahyi Ndióxi já cúu á tátuhun ndiquehe vaha í ña cáchí mé á ini ínima yo. Joo na co cándúsa ña yóho ndája na ña ná nduu Ndióxi ña túhún jáchi co cándúsa na ña cáhan mé á sahá Jesucristo, jahyi a. <sup>11</sup>Ta tuhun sáhan Ndióxi cúu ña yóho: Nasáhan mé á ñamaní catacú anda ama cáa quivi. Ta Jesucristo, jahyi mé á quea cája ña ná catacú indiví anda ama cáa quivi. <sup>12</sup>Ta ndá na nandiquiahva mé ndáha Jesucristo, mé á cúu in túhún jini já jahyi Ndióxi, na jan cúu na catacu na anda ama cáa quivi nu íin mé á. Joo ndá na coó naxeen ndíquiahva mé ndáha mé á a cúu catacu na anda ama cáa quivi xihin mé á.

**Cáhyí chága Juan sahá ña ndítahan caja í**

<sup>13</sup>Cáhyí í ña yóho nu ndóhó, na cándéé ini Jesucristo, jahyi Ndióxi já ná candaa ini ndó ña catacu ndó indiví anda ama cáa quivi.

<sup>14</sup>Ta co yíhví toho í xíca í nu mé á in ñaha, ña cúní a quiahva nu yo jáchi cándaa cáxí iní ña xini johó a nu cáhan yo. <sup>15</sup>Ta tá cándaa iní ña xini johó Ndióxi nu cáhan yo já quea cándéé iní ña quiahva tá quiahva mé á ña nu yo.

<sup>16</sup>Tá ná cuni ndó ñani ndó, na cúu cuéntá Jesús ta caja na cuachi ña cuu caja cáhnu ini Ndióxi saha já quea ndítahan cacá tahví ndó nu Ndióxi sahá na cán. Ta xihín ña yóho caja cáhnu ini Ndióxi sahá na jan já ná catacu na anda ama cáa quivi. Joo íin cuachi ña cañehe ñahá cuhun indayá ta co ndítahan cacá tahví yo nu Ndióxi sahá ña jan. <sup>17</sup>Tócó ndihi ña núu cája í



## 1 JUAN 5

ñuyíví yóho cúú á cuachi nu Ndióxi joo cuahá ndivaha cuachi cája cáhnu ini Ndióxi saha.

<sup>18</sup>Ta cándaa iní ña tóco ndihi na cúú jahyi Ndióxi co xica ga na nuú cuachi jáchi ndáá Jesucristo mé ná, mé á cúú in túhún jini já jahyi Ndióxi já ná a cája tiñáhá sacuahá ni in ña núu xihin ná.

<sup>19</sup>Cándaa vaha iní ña cómi Ndióxi cuéntá saha yo joo tóco ndihi ñayivi cuéntá ñuyíví núhu na ndahá tiñáhá sacuahá ta cómi rí cuéntá saha ná.

<sup>20</sup>Ta cándaa cáxi iní ña naquixi Jesucristo, mé á cúú jahyi Ndióxi ta najándiyehé a xini túni yo já quéa ná cándaa iní ña cúú mé á ña ndaa. Ta viti in nanduú xihin mé á jáchi in nanduú xihin Jesucristo, mé a cúú in túhún jini já jahyi Ndióxi. Mé a yóho cúú ndusa Ndióxi ta cúú á ña cája ña ná catacú anda ama cáa quivi. <sup>21</sup>Candehé ndo. Mé ndó cúú ndó tátuhun jahyi i ña cán quéa cáhan i ña yóho xihin ndo. Coto a cája cáhnu ndó ni in yoco ta ni a cája cáhnu ndó ni in ñaha tá co cúú á Ndióxi. Já ná coo.